

天問（楚辭第三）

曰遂古之初。誰傳道之。上下未形。何由考之。冥昭瞢闇。誰能極之。馮翼惟像。何以識之。明明闇闇。惟時何為。陰陽三合。何本何化。圜則九重。孰營度之。惟茲何功。孰初作之。斡維焉繫。天極焉加。八柱何當。東南何虧。九天之際。安放安屬。隅隈多有。誰知其數。天何所沓。十二焉分。日月安屬。列星安陳。出自湯谷。次於蒙汜。自明及晦。所行幾里。夜光何德。死則又育。厥利維何。而顧菟在腹。女歧無合。夫焉取九子。伯強何處。惠氣安在。何闔而晦。何開而明。角宿未旦。曜靈安藏。不任汨鴻。師何以尚之。僉咎何憂。何不課而行之。鴟龜曳銜。鮫何聽焉。順欲成功。帝何刑焉。永遏在羽山。夫何三年不施。伯禹腹鮫。夫何以變化。纂就前緒。遂成考功。何續初繼業。而厥謀不同。洪泉【淵】極深。何以窺之。地方九則。何以墳之。應龍何畫。河海何歷。鮫何所營。禹何所成。康回馮怒。地何故以東南傾。九州何錯。川谷何洿。東流不溢。孰知其故。東西南北。其脩孰多。南北順槩。其衍幾何。崑崙縣圃。其尻安在。增城九重。其高幾里。四方之門。其誰從焉。西北闢啟。何氣通焉。日安不到。燭龍何照。羲和之未揚。若華何光。何所冬暖。何所夏寒。焉有石林。何獸能言。焉有虬龍。負熊以遊。雄虺九首。儵忽焉在。何所不死。長人何守。靡萍九衢。臬華安居。一蛇吞象。厥大何如。黑水玄趾。三危安在。延年不死。壽何所止。鯀魚何所。魋堆焉處。羿焉彈日。烏焉解羽。禹之力獻功。降省下土四方。焉得彼姁山女。而通之于台桑。閔妃匹合。厥身是繼。胡維【為】嗜欲不同味。而快鼂飽。啟代益作后。卒然離蠶。何啟惟憂。而能拘是達。皆歸射籍。而無害厥躬。何后益作革。而禹播降。啟棘賓商。九辯九歌。何勤子屠母。而死分竟墜。帝降夷羿。革孽夏民。胡羿射夫河伯。而妻彼雒嬪。馮珧利決。封豨是射。何獻蒸肉之膏。而后帝不若。浞娶純狐。眩妻爰謀。何羿之射革。而交吞揆之。阻窮西征。巖何越焉。化而為黃熊。巫何活焉。咸播秬黍。莆藿是營。何由并投。而鮫疾脩盈。白蜺嬰茀。胡為此堂。安得夫良藥。不能固臧。天式從橫。陽離爰死。大鳥何鳴。夫焉喪厥體。萍號起雨。何以興之。撰體協脅。鹿何膺之。鼈戴山抃。何以安之。釋舟陵行。何之遷之。惟澆在戶。何求于嫂。何少康逐犬。而顛隕厥首。女歧縫裳。而館同爰止。何顛易厥首。而親以逢殆。湯謀易旅。何以厚之。覆舟斟尋。何道取之。桀伐蒙山。何所得焉。妹嬉何肆。湯何殛焉。舜閔在家。父何以鰥。堯不姚告。二女何親。厥萌在初。何所意焉。璜臺十成。誰所極焉。登立為帝。孰道尚之。女媧有體。孰制匠之。舜服厥弟。終然為害。何肆犬體。而厥身不危敗。吳獲迄古。南嶽是止。孰期去斯。得兩男子。緣鵠飾玉。后帝是饗。何承謀夏桀。終以滅喪。帝乃降觀。下逢伊摯。何條放致罰。而黎伏大說。簡狄在臺。嚳何宜。玄鳥致貽。女何喜。該秉季德。厥父是臧。胡終弊于有扈。牧夫牛羊。

干協時舞。何以懷之。平脅曼膚。何以肥之。有扈牧豎。云何而逢。擊床先出。其命何從。恒秉季德。焉得夫朴牛。何往營班祿。不但還來。昏微循跡。有狄不寧。何繁鳥萃棘。負子肆情。眩弟並淫。危害厥兄。何變化以作詐。後嗣而逢長。成湯東巡。有莘爰極。何乞彼小臣。而吉妃是得。水濱之木。得彼小子。夫何惡之。媵有莘之婦。湯出重泉。夫何臯尤。不勝心伐帝。夫誰使挑之。會鼃爭盟。何踐吾期。蒼鳥群飛。孰使萃之。列擊紂躬。叔旦不嘉。何親揆發。足【定】周之命以咨嗟。授殷天下。其位安施。反成乃亡。其罪伊何。爭遣伐器。何以行之。並驅擊翼。何以將之。昭后成遊。南土爰底。厥利維何。逢彼白雉。穆王巧梅。夫何為周流。環理天下。夫何索求。妖夫曳銜。何號于市。周幽誰誅。焉得夫褒姒。天命反側。何罰何佑。齊桓九會。卒然身殺。彼王紂之躬。孰使亂惑。何惡輔弼。讒諂是服。比干何逆。而抑沈之。雷開阿【何】順。而賜封之金。何聖人之一德。卒其異方。梅伯受醢。箕子詳狂。稷維元子。帝何篤之。投之于冰上。鳥何燠之。何馮弓挾矢。殊能將之。既驚帝切激。何逢長之。伯昌號衰。秉鞭作牧。何令徹彼歧社。命有殷之國。遷藏就歧。何能依。殷有感婦。何所譏。受賜茲醢。西伯上告。何親就上帝罰。殷之命以不救。師望在肆。昌何志。鼓刀揚聲。后何喜。武發殺殷。何所悒。載尸集戰。何所急。伯林雉經。維其何故。何感天抑墜。夫誰畏懼。皇天集命。惟何戒之。受禮天下。又使至代之。初湯臣摯。後茲承輔。何卒官湯。尊食宗緒。勳闔夢生。少離散亡。何壯武厲。能流厥嚴。彭鏗斟雉。帝何饗。受壽永多。夫何久長。中央共牧。后何怒。蠶蟻微命。力何固。驚女采薇。鹿何祐。北至回水。萃何喜。兄有噬犬。弟何欲。易之以百兩。卒無祿。薄暮雷電。歸何憂。厥嚴不奉。帝何求。伏匿穴處。爰何云。荊勳作師。夫何長先。悟過改更。我又何言。吳光爭國。久余是勝。何環穿自閭社丘陵。爰出子文。吾告堵敖。以不長。何試上自予。忠名彌彰。

版本信息：明·萬曆卅八年烏程閔齊汲校《楚辭》白文二卷，三色批註本。文中黑魚尾括弧中字為原書校改。

編者按語：黃帝降生四千七百三十一年十一月廿一（西元2021年1月4日）寫定。